

# Prometheus : un projècte europèu sus eras hèstas deth huec deths Pirenèus

## Ua delegacion deth Ostau Comengés que se desplaçèc a Lhèida coma partenari associat

Eth 29 de gèr de 2020 que's tenguec eth acte de presentacion oficiau deth Projècte Prometheus ara Universitat d'Educacion Psicologia e Trabalh Sociau de Lhèida sus invitacion de Jaume Puy, rector dera Universitat de Lhèida, e de Rosa Amorós, delegada deth Govèrn ath Naut Pirenèu e Aran, e secretària generala dera Comunautat de Trabalh deths Pirenèus.

Aqueth projècte europèu interregionau POCTEFA qu'amassa ueit institucions deths dus costats deths Pirenèus, que son eras universitats de Lhèida, de Barcelona e de Perpignan, eth departament dera cultura dera Generalitat de Catalonha, eth govèrn d'Andòrra, eth Conselh Generau d'Aran, era Deputacion de Lhèida e eth CIRDÒC.

Ua delegacion deth Ostau Comengés que s'i desplaçèc coma partenari associat. Enas intervencions deths representants de cada institucion, qu'estèc plan assolidada era grana importància dera coneishença deth terren peth trabalh d'investigacion miat peths partenaris associats, coma eth Ostau Comengés en Comenge e Varossa qu'estèc citat mès d'un còp.

Aqueth projècte que's pensa coma un liader entram diferents territòris pirenençs, plan diferents mès que partatjan un madeish hons etnic e culturau. Qu'estèc soslinhada era dimension istorica d'aqueth tipe de cooperacion transfronterera qu'a tostemp marcat eras relacions entre pirenençs tot ath long deths sègles, e mès d'un còp eth eretatge culturau dera "Nacion Occitana" d'abans eth sègle XIII que hoc ahortit coma honamentau taras institucions catalanas deth sègle XXI e qu'an permès de desenvolopar projèctes d'aqueth tipe.

Mès concretament, aqueth hialat que trabalharà ara valorizacion e ara divulgacion deras hèstas deth huec en eths Pirenèus, qu'aurà de tornar portar eth huec ath còr dera poblacion a través d'innovacions culturals e d'accions cap ara joenessa e en integrar-las damb eras problematicas pedagogicas, sòcioeconomicas o ambientalas: materiaus pedagogics taras escòlas e collègis-licèus, creacion d'un musèu virtuaü sus *falles*, haros, hars e halhars, sensibilizacion e divulgacion cap aths vilatges halhaires...

Tanplan Prometheus que prevetz d'apregondir era coneishença scientifica dera question, a través dera organizacion d'un Seminari Internacionau, en perseguir eth trabalh d'inventari e de recèrca a través de comunicacions, publicacions e supòrts diversès...

Plan segur, aquera juntada ja pòt alandar cap a d'autas possibilitats entà valorizar eth PCI de cada costat deths Pirenèus: ger coma aué e tà deman, ja mos cau pensar eths Pirenèus coma un liader e un gran ensemble culturau e non coma ua termièra.

Matiu Faure